

– Ինչպե՞ս էք կարծում, պարոն քարտուղար, այդ անցքը նոյնպես չ՞
տանում դեպի մի բիւրեղեայ ապարանք, ուր հիւրիներն եւ փերիները պառ-
կած են մարջանի ծամերի ներքոյ եւ սքանչանում են «հազարան բլրուլի»
հազար ու մէկ եղանակներով:

– Դուք ծաղրում էք ինձ, պարոն բժշկապետ, – պատասխանեց երի-
տասարդը նոյնպես ժպտելով, – բայց ես կասեմ ձեզ, որ այդ անցքը դեպի
բիւրեղեայ ապարանքը չէ տանում, որովհետեւ դեպի ծովը չէ գնում: Մարջա-
նի ծամերը ծովի յատակի վրայ են բուսնում եւ բիւրեղեայ ապարանքն էլ
ջրերի խորքումն է լինում: Իսկ այդ անցքը, քարափը կտրելով, իջնում է դեպի
ցած, յետոյ գետնի տակով գնում է դեպի այն ձորը, որի մի մասը երեւում է
բլուրների հետեւից: Նա ձեռքը մեկնեց դեպի այն կողմը:

– Ներեցէք, ինդրեմ, իմ նկատողութիւնը դուք, ի հարկէ, կատակի տեղ
կընդունէք: Իսկ ձեր այժմեան պատմածը դարձեալ շատ հետաքրքիր է: Ես
շատ բերդեր եմ տեսել, բայց մի այսպիսի անցք առաջին անգամն եմ տես-
նում իմ կեանքում, երեւի դրա ծայրը, այսինքն այն տեղը, որ դուրս է գալիս
ձորի մէջ, անպատճառ ծածկոած կը լինի:

– Անտարակոյս, մանաւանդ մի դէպքից յետոյ, որ պատահեց մի տարի
առաջ. պահապան զինուորներից մէկը սովորութիւն էր ունեցել վառօդ գողա-
նալ եւ այդ անցքով դուրս տանել, վաճառել հայ խանութպաններին: Չինուո-
րին եւ խանութպաններին սաստիկ պատժեցին, եւ անցքի մուտքը այն ժա-
մանակից գոցեցաւ:

– Որքա՞ն զարգացած է եղել հին ժամանակներում արհեստը այդ երկ-
րում, – ասաց Աւլանը, արտայայտելով իր խորին հիացմունքը: – Այդ անցքե-
րը հազարաւոր տարիներ գոյութիւն ունեն, բայց այնքան ճարտարութեամբ
շինուած են, որ մինչեւ այսօր չեն խանգարուել, պահպանում են իրանց նշա-
նակութիւնը:

– Դուք աւելի կը զարմանաք, պարոն բժշկապետ, երբ կը տեսնէք
Թօփրակ-կալէի եւ Չարխի-Ֆալակի գաղտնի անցքերը, – պատասխանեց
առաջնորդը մի առանձին պարծենկոտութեամբ, երբ լսեց Աւլանի գովա-
սանքները (կարծես այդ հրաշալիքները նրա պապերն էին ստեղծագործել):
– Երբ այստեղ կը վերջացնենք, ես կը տանեմ ձեզ դեպի յիշեալ հնութիւննե-
րը, որոնք բաւական հեռաւորութեան վրայ են գտնուում այստեղից: Դուք կը
տեսնէք այնտեղ աւելի զարմանալի ստորերկրեայ անցքեր, որոնք այնքան
երկար են տարածուում գետնի տակով, որ շատերը հաղորդակցութիւն ունեն
հէնց այդ բերդի հետ: